

Dancà y da na pert

Uedli y oredles daverc sun la sozieté ladina d'aldidancuei

Pauli Berna

Marangon de Urtijëi y fan espert di Genesis



USC: Da lëur iel assé?

Pauli Berna: Sci, l tleca vester boni, sté tl priesc y vester de parola. Nëus on la cualità al mascimo, chël me nfdi propi a dî.

Da tan giut incà laurëis'a bele?

Scumencià da tistler éi tl 1980, canche son jit lerner dal moster Luis dl Sartëur a Urtijëi. Iló sons stat trëi ani lerner y pona cater ani fant.

Y fòvel pa nce da jì a scola?

Jive ala scola profesciunela un n iede al'ena a Bulsan, ulache fajan teoria y pratica. Chësc per trëi ani. Do l ejam da lerner éi laurà cater ani da fant, coche dit. I ultimi doi ani éi fat i cursc che va debujën per pudëi pona fé l ejam da moster. Chël éi fat tl 1987.

Y co iela pa jita inant?

Pernanche ove l ejam éi scumencià a lauré da sël, metan sun na mi dita. Muesse dî che l é fat zënza savëi avisa a cieche n ti va ancontra. Son jit a lauré da sël per me sentì plu liede. Chësc fova mi pensier dantaldut, nia tan l paiamënt.

Co minëis'a Vo de vester liede, tl lëur o n generel?

É for abù la pascion de jì de viac, y ie ulove me n jì canche y tan giut che esse ulù. Chësc jiva mé a lauré da sël.

Ma ëis'a pona for laurà da sël?

Muesse dî, o miec posse dî, che é bele dal scumenciamënt incà abù trup da lëur y n gran note. Y perchël éi riesc tëtut su n iede un, pona doi, pona trëi y pona cater cunlauradëures. Do dodesc ani che é laurà tla cësa de familia, la cësa Berna tla streda Nevel, sons jit ora tl raion

artejanel de Puntives, ulache son bele da chindesc ani incà.

Dlongia l lëur ëis sambën mo n'otra pascion?

Sci, la mujiga ie mi gran pascion, da for incà. Bele da pitl insù, ove n dodesc ani, éi tres mi fra Alex, che ie purtuep bele mort, scumencià a scuté su i Genesis. Canche duc me dijova che son mat a scuté su na tel mujiga: "Chësta ne sarà mianó mujiga!" Ntlëuta, fan ala fin di ani setanta, scutova chëi de mi tēmp via mé su mujiga disco.

La pascion per i Genesis dura inant?

Sci, per i Genesis, ma pona nce per i Pink Floyd y n generel per dut l rock progress. Chësta mujiga me à cumpanià y me cumpanieia mo for tres mi vita. Ne pudësse nia me nmaginé na vita zënza mujiga, na cossa che me dà tan de gran emuzions. Te mi vita éi for ulù avëi mi libertà, vester liede defin. Chësc sentiment abini nce tla mujiga y ti viages.

Pudëis'a spieghé, n curt, cie che ie l rock progress?

L ie n rock che à na struttura de mujiga mpue' sia, cun n crescendo for su y su, ma pona inò n decrescendo ju y ju, mpue' sciche jì cun la roda, su y ju, zënza la struttura che l ie zënza cun prima strofa y refrain, segunda strofa y refrain y nsci inant.

Metëis nce su mujiga te Radio Gherdëina?

Cun Leander Perathoner se ancuntons te studio uni segunda sada a mëter su, sambën dantaldut rock progress, che ie sciche na opera de mujiga tlassica, ma sambën te chësc cajo tla verscion rock!

*Ntervista de
David Lardschneider*